

CONVENIO ENTRE O CONSELLO GALEGO DE RELACIÓNS LABORAIS E A UNIVERSIDADE DE SANTIAGO DE COMPOSTELA POLO QUE SE INSTRUMENTA A SUBVENCIÓN NOMINATIVA PARA A REALIZACIÓN DA PRIMEIRA EDICIÓN DE TRES CURSOS DE FORMACIÓN ESPECÍFICA, EN FORMA DE MICROCREDENCIAIS UNIVERSITARIAS.

MEMORIA XUSTIFICATIVA

O Consello Galego de Relacións Laborais, en xuntanza da Comisión Permanente de data data 29 de xaneiro de 2025, e dentro do ámbito das súas funcións conforme á normativa reguladora, acordou a realización da I edición de tres Cursos de Formación Específica, en forma de microcredenciais universitarias, co obxecto de ofertar unha formación especializada breve, que ten como obxectivo posibilitar que as persoas adquiren, actualicen e melloren os coñecementos, habilidades e capacidades necesarios para prosperar nun mercado laboral e nunha sociedade en constante transformación (Recomendación do Consello Europeo do 16 de xuño de 2022). Estas actividades formativas de menos de 15 créditos ECTS, organizadas baixo a forma de microcredenciais, permitirán certificar resultados de aprendizaxe ligados a actividades formativas de corta duración, con independencia de que as persoas destinatarias posúan ou non unha titulación universitaria previa.

A Lei Orgánica do Sistema Universitario (LOSU), recentemente aprobada, recolle no seu artigo 2.2, entre as funcións das universidades, “A transferencia e intercambio do coñecemento e da cultura ao conxunto da sociedade a través da actividade universitaria e a formación permanente ou ao longo da vida do conxunto da cidadanía”.

Esta Lei Orgánica incorpora e reforza, polo tanto, a función das universidades como institucións para todas as idades: consagra a formación ao longo da vida como unha función básica da universidade; prevé que as persoas sen titulación universitaria habilitante poidan acceder ás titulacións de formación ao longo da vida; establece que as administracións deben fomentar programas de becas e axudas para este tipo de formación, e dispón que a financiación por obxectivos da universidade inclúa obxectivos estratéxicos relativos a esta modalidade de formación.

As persoas destinatarias son estudantes e titulados en Dereito, Relacións Laborais e Recursos Humanos, Ciencias do Traballo, Ciencias económicas e empresariais e Administración e dirección de empresas; asemade, persoas responsables de recursos humanos, de prevención de riscos laborais, xefes de relacións laborais, asesores e cadros das organizacións sindicais e empresariais, e demais persoas non tituladas ou profesionais vencellados ao mundo das relacións laborais.

As organizacións empresarial e sindicais representadas no Consello Galego de Relacións Laborais (CEG, CIG, UGT Galicia e SN de CCOO de Galicia) proporán, para cada un dos cursos, ata un máximo de vinte (20) participantes. Unha vez recibida a relación de estudantes propostos polas mencionadas organizacións, será remitida dende este organismo á USC, aos efectos da súa inscrición e matrícula.

Outorgaráselles ás persoas participantes nos cursos de microcredenciais que o superen, unha certificación en formato electrónico acreditativa, así como unha acreditación específica de microcredencial universitaria dixital, na que se acreditarán as competencias e os resultados de aprendizaxe adquiridos. Os cursos de microcredenciais poderanse agrupar para acadar unha titulación maior, en función do número de créditos e dos requisitos de acceso, conforme á lexislación aplicable.

Tendo en conta todo o anterior, este convenio establece as condicións polas que se instrumenta a concesión da subvención á Universidade de Santiago de Compostela prevista de forma nominativa na Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, para a realización da I edición de tres Cursos de Formación Específica, en forma de Microcredenciais Universitarias, de conformidade co establecido nos artigos 19.4.a) e 26 da Lei 9/2007, do 13 de xuño, de subvencións de Galicia e no artigo 37 do Decreto 11/2009, do 8 de xaneiro, polo que se aproba o seu Regulamento.

Esta I edición de tres Cursos de Formación Específica, en forma de Microcredenciais Universitarias, celebrarase desde o 13 de maio ao 2 de outubro de 2025, en modalidade presencial, na facultade de Dereito da USC.

O Consello Galego de Relacións Laborais contribuirá ao financiamento deste curso de formación mediante a subvención nominativa “Á Universidade de Santiago de Compostela”, con cargo ao capítulo IV do seu orzamento, recollida na aplicación orzamentaria 14.B1.324A.444.12, cunha dotación orzamentaria total de DEZAOTO MIL EUROS (18.000€), polo que está previsto crédito necesario e suficiente, segundo certificación expedida pola secretaria xeral do organismo, que se xunta a este convenio como Anexo II.

Santiago de Compostela, na data da sinatura dixital

A secretaria do Consello Galego de Relacións Laborais

Cristina Fabeiro Varela